

werd gestärckt/ vnd demüthige dich vnter die Hand des HERODEN. Folge nach dem David/ vnd erlege den Widersacher mit ein einigen Steinwurff/ die Engel Gottes stehen bey dir als Zuschauer deines Lebens/ dann wir/ spricht Paulus/ seynd ein Schauspiel worden/ der Welt/ den Englen/ vnd den Menschen/ so sie dich werden sehen vberwinden/ werden sie in deinem guten Werck erfreuet/ wirstu aber vberwunden/ werden sie trawrig von dir abweichen/ vnd dich nicht ansehen können/ die Teuffel aber werden dich verspotten. Darumb ergreiffe für das Schwerdt die Forcht Gottes/ dann die Forcht Gottes ist gleich einem zweyschneidigen Schwerdt/ das da zerhawet alle böse Lust.

Deßhalben fasz allzeit die Forcht Gottes/ vnd bedenck fleissig diesen zukünfftigen letzten Tag/ wann die brennende Himmel werden zergehen/ vnd die Element vor Hitze zerschmelzen/ das Erdrich aber vnd alle Werck so drinnen seynd verbrennen werden/ vnd die Stern vom Himmel gleich wie die Blätter von einem Baum fallen/ die Sonne aber vnd der Mond werden verfinstert/ vnd ihren Schein nicht mehr geben/ wann die Sonn des Allerhöchsten wird offenbar werden/ vnd hernider kommen von dem Himmel auff Erden/ vnd die Kräfte der Himmel werden bewegt werden/ da die lauffenden Engel werden erscheinen/ vnd die Stimmen der Posaunen hören lassen/ Feuer wird vor ihm her flammen/ vnd sich erkündet/ vnd den ganzen Erdkreyß durchlauffend verzehren wie Stroh/ vmb ihn her gewulich Ungewitter. Es werden seyn gewulche Erdbebung/ Schawer vnd Donner schläg/ dergleichen nie gewesen/ noch auff den heutigen Tag seynd/ also das sich die Bevestigungen der Himmel mit gewulichem Krachen werden zerschellen. Wie sollen wir dann O ihr meine lieben Brüder geschickt seyn? Welch ein Forcht/ ja wie ein Schrecken vnd Zittern wirdt vns ankommen? Bedenck doch nur/ wie die Israeliter in der Wüsten nicht kundten erleyden den Schawer vnd Finsternuß/ vnd die Stimm des lebendigen Gottes redende auß dem Mittel des Feuers/ sonder verschuffen/ das er nicht mit ihnen reden solte/ da er doch nicht mit ihnen zu zürnen herab kame/ noch auß zornigem Muth mit ihnen redte.

Nun